

**Meeqqat atuarianni inuusuttut immikkut annertusisamik atuartaasimasut atuarunnaarnerup kingorna suliniuteqarfigineqarnerat pillugu apeqquteqaat aallaavigalugu oqallisissiaq.**

(Inatsisartunut ilaasortaq Debora Kleist, Inuit Ataqatigiit)

**Akissuteqaat**

(Ilinniartitaanermut, Ilisimatusarnermut Nunanillu Avannarlernik Suleqateqarnermut Naalakkersuisoq)

Naalakkersuisut takorluugaraat, inuusuttut tamarmik inuutissarsiutigilersinnaasaminnik ilinniagaqarnissamut periarfissinneqarnissaat. Tamanna aamma inuusuttunut annertusisamik immikkut atuartaasimasunut atuuppoq.

Naalakkersuisut Ilinniartitsinermit Periusissiaanni ersippoq, ullumikkut meeqqat atuariata kingorna ilinniagaqartanngitsut qanoq annertutiginerat erseqqissumik ilisimasaqarfiginngikkippat. Taamaammat Naalakkersuisut pineqartut qanoq amerlatiginerat qanorlu katitigaanerat erseqqissumik paasiniaarlugu suliaq aallartippaat. Suliaq tamanna inuit immikkut pisariaqartitsisut annertussusaannik paasiniaanermut annertunerusumut ilaavoq, tamatumani meeqqanit suli atualinngitsuniit inersimasunut ilaatinneqarput.

Inuusuttut pineqartut assigiinngisitaartumik isiginneriaaseqarfiginissaat pisariaqarpoq. Iltersuinikkut suliniuteqarnej annertusartariaqarpoq, pineqartullu ilinniartinnerat ilinniartitsinikkut tunngaviit naleqqussakkat naaportorlugit pisariaqarluni, ilinniartitsinikkut immikkut suliniutinik tapertaqartinneqartumik.

Naalakkersuisut isumaqarluinnarput meeqqanut inuusuttunullu periusissiap, Siunnersuisarfik PPR-ip kommuninut nuunneqarnerata, ilinniartitsineq pillugu periusissiap malitseqartinnerata aamma atuartunut atuarnermik allannermillu ajornartorsiuteqartunut kiisalu meeqqanut, inuusuttunut inersimasunullu ADHD-qartunut autisime-millu ajornartorsiuteqartunut tunngatillugu iliuusissatut pilersarusiat, piffissaq ungasinnerusoq eqqarsaatigalugu kingunerissagaat, inuusuttut pineqartut ikiorsiivigineqarnerat. Suliaq annertoq Naalakkersuisut aallartippaat, attuumassuteqartut arlalippassuit qanimut suleqatigiinnissaannik pisariaqartitsiviusoq.

Piareersarfiit pillugit apeqqutinut atatillugu Naalakkersuisut ilisimatitsissutigisinnaavaat, Piareersarfiup inuit Piareersarfiimi naammassillutik ingerlatsisinnaasutut nalilerneqartut ilinniartunngortittarmagit. Tamatumani ilaasinnaapput inuit meeqqat atuariannit inaarutaasumik misilitsissimasutut allagartaqanngitsut.

Ukiaru Inatsisartut ataatsimiinneranni Naalakkersuisut inuusuttut 25-t inorlugit ukiullit suliffeqaratillu ilinniagaqarnissamut piareersimanngitsut pillugit nalunaarusiaq saqqummiutissavaat. Tassani ilaatigut allaaserineqassaaq inuusuttut taakku qanoq ulluinnarisaminni inuiaqatigiinnilu inooqataanermikkut ingerlanersut.

Aammattaq ilisimatitsissutigineqassaaq kommunit arlallit inuusuttut atuagarsornikkut sannginnerusut piginnaanngorsarnerinik ingerlataqarmata. Taamaalilluni illoqarfinni arlaqartuni Piorsaaviit ilinniarfiillu assessorissanik ingerlatsiviusut ingerlappat.

Piffissami qaninnermi Naalakkersuisut misiliummik ingerlatsilersaarput, inuusuttut pineqartutut ajornartorsiutillit ilinniakkamik aallartitsinissamut periarfissinnissaat sulilernissaalluunniit siunertaralugu.

Taama oqaaseqarlunga oqallinneq oqaaseqartarunut ataasiakkaanut tunniuppara.